

# Kebek

## strizh an trec'h evit an dizalc'hourion



©@Bouchaci

An dizalc'hourez Pauline Marois (PQ) zo aet da gentañ ministrez Kebek. Amañ e weler anezhi e-kerzh he c'houlzad kabaliñ, d'an 3 a viz Gwengolo 2012.

**Anat e oa an traoù. Goude mizioù dindan ar bec'h, da-heul an hir a harz-labour renet gant ar studierion, e oa aet votadeg kannaded Kebek da referendom "evit" pe "a-enep" ar c'hentañ ministr kozh Jean Charest hag ar Strollad Frankizour (PLQ). D'ar 4 a viz Gwengolo da noz, pa oa bet diskuilhet an disoc'hoù ne oa ket pikol tud o lonkañ gwin-champagn avat...**

**a** ar re "o deus graet you-you [d'ar 4 a viz Gwengolo] a oa tapet gant ar boeson 'm eus aon. Rak ne gav ket din eo un drec'hadenn vras. Kement-mañ diouzh kement tu eus an dachenn bolitikel m'emeur e gwirionez". Sed ar pezh en deus Carlo Mosti skrivet berr-ha-berr e-barzh *Le Québécois*, soñj ar braz eus an dizalc'hourion da-heul ar votadeg. E-se eo bet strizh-tre trec'h ar Strollad Kebek (PQ), anezhañ ar strollad kreñvañ eus kostezenn an dizalc'hourion. Gant 54 c'hannad (31,93% eus ar mouezhioù) n'hall ket ar PQ gouarn ar vro en e aez dre ziuver a vuiañ-niver er Parlamant avat. Pauline Marois zo aet da gentañ ministrez en anv ar strollad memestra.

### KOSTEZENN EBET TREC'H

Eus o zu, gant o 50 kannad (31,2% eus ar mouezhioù) n'o deus ket frankizourion ar PLQ paket kement-se. Bout m'eo bet trec'het Jean-Charest gant ur "pekour" (d.l.e. un ezel eus ar PQ) en e bastell-vro eus Sherbrooke, n'eo ket bet diskaret ar PLQ kement ha ma oa diouganet gant ar sontadegoù.

### AR CAQ DA DREDEOG

N'eus ken nemet ar CAQ (Emglev Dazont Kebek), bet savet gant un den a aferioù, hag a c'hell bout laouen mui-pe-vui gant an disoc'hoù. Eus an tu dehou, ar CAQ a zo deuet a-benn da rentañ penn ouzh an daou strollad bras all. Ha n'eo ket diboell soñjal e c'hellfe hemañ c'hoari e jeu e-barzh politikerezh ar vro er bloavezhioù da zont, ken fin eo e savlec'hiañ politikel : frankizour a-walc'h evit tennañ mouezhioù digant ar PLQ ha broadelour a-walc'h evit hoalañ mouezhierion ar PQ. Evit a sell ouzh dizalc'hiezh ar vro n'eo ket gwall sklaer e soñj avat. Hervez ar strollad da skouer, e vefe mat goursezañ e-pad dek vloaz a-raok ober ur referendom nevez diwar-benn an dizalc'hiezh. War-se, gouez d'ar CAQ, "emañ an dalc'h-se e-kreiz ar c'hoari politikel abaoe re bell zo."

### AN TU KLEIZ PELLAÑ HEBIOU

N'eo ket deuet a-benn ar strolladoù all da dennañ o frap en taol-mañ avat. Kebek Kengret (QS), strollad an dizalc'hourion eus kleiz an tu kleiz, en deus gounezet ur sez e-keñver ar votadeg diwezhañ. Amir

Khadir, unan eus mouezhioù ar strollad gant arwarzh<sup>1</sup>, en deus miret e sez, tra ma'z eus bet gounezet unan all gant François David, mouezh all ar QS. Ur brud *bobo-arty* (d.l.e. bourc'hizion hag intelektualed) zo gant mouezhierion QS avat. Ar re-se a vev e karterioù diouzh ar c'hiz eus Montréal, un tamm diwar batrom brud izili ar *Front de Gauche* e Frañs. Daoust da QS bout "a-gleiz eus ar gostezenn gleiz", n'en deus tamm krog ebet e renkadoù al labourerion.

Ur strollad all, Dibab Broadel (ON) en deus skoet hebiou ivez. Gant 1,9% eus ar mouezhioù, ar strollad nevez-c'hanet, dizalc'hour-krenn eus an tu kleiz, n'en do kannad ebet.

### DISTABIL

Diaes e vo gouarn ar vro gant breujoù ken distabil neuze. Gant ar gwalldaol a zo c'hoarvezet e-kerzh nozvezh an disoc'hoù, ma tennas ul lealour kanadian ledan e dog war emsaverion ar PQ (o lazhañ un den ha gloazañ un eil), ne grog ket pep tra a-du da 40<sup>vet</sup> respet-lezenniñ breujoù broadel Kebek, 'm eus aon.

**Fabien Lécuyer**

1. arwarzh : barregezh un den a oar bezañ skedus ha galloudus dirak ar re all (galleg *charisme*).